

andasse qualche uno di sopracomiti che fosseno periti, *aliter* el suo paron per capo. El qual capo habi a deputar un capo ad ogni X di lhorò, e habino a tegnir una lista a homo per homo, e habi a star de continuo a presso el suo capo, per poter exercitarli in ogni tempo. *Item*, ha facto de tute le nave meter in terra homeni 50 per una, con e lor patron, di quelli sono exercitati; *aliter* con uno suo capo sufficiente. E sopra tuti li navaroli, ha mandato missier Marco Orio, vice capetanio suo, el qual perhò habi a star a obedientia di missier Tomà Zen. El qual, con tuto el campo, se inviò a dì 7, a l'alba, con le artilarie et altre provisioni, con comission da tuti se fazi obedir, come si fusse el zeneral, dandoli libertà di punir cadauno, e sia chi esser si voglia, fino a tuorge la vita. E a ciò cadauno se rendi più pronto e volentoso a non stimar alcun pericolo, li ha dato hordine, per nome suo, fazi *publice* bandir che 'l primo che entrerà dentro la terra, o ver monterà sopra le mure, habi *immediate* de contadi da sua magnificencia aspri 3000; et se 'l sarà galioto, possi andar balestrier su che galia el vorà, sì grossa come sotil, per anni X proximi; e se 'l sarà balestrier, possi andar simelmente balestrier per anni X; si 'l serà compagno, possi andar paron; si paron, comito; si comito, homo di conseio; et cussì de grado in grado, secondo le condition lhorò; e possi trazer un de bando de tute terre e luogi di la Signoria nostra, sì da terra come da mar; e se lui proprio fossè bandizato, sia assolto, excepti *tamen* rebelli, monetarij e assassini. El secundo habi aspri 2000, el 3.º 1000, con tute le condition dil primo. E se 'l sarà persona di altra sorte cha maritimo, oltra li danari, e 'l trar di bando, si proveda per la soa persona, per modo che restarà contento. *Etiam, publice* ha facto stridar a son di tromba, che ogni inobediente e qualunque anderà per l'isola robando o fazando un minimo danno, sia *immediate* impicato per la gola; et ha facto drezar a prova un paro di forche. E perchè sono gripi e brigantini inumerabili, tutti corsi per robar, azò non possino dannizar quelli di l'isola, i quali tutti se sono venuti a inclinar, ha ordinato che 4 galie vadino *circum circa* l'isola a far do effecti: l'uno, vardi che questi gripi e brigantini troverano, li fazino venire in porto; l'altro, azò oltra la guardia deputata a l'armata in porto o fuor di porto, se fazi un'altra miglior guardia; il che dà che dir a tuta l'armata, perhò che mai ni guardia ni antiguardia soto el Grimani fu fato, nè in porto, nè in mar, nè tra amici, nè tra inimici. Le qual provision hanno erecti li animi persi di nostri, e suppressi quelli di

turchi, che erano molto elati, e chiamano questo capetanio, un nome quasi terribile. Et il ditto de Cabrias è vero, ch'è greco proverbio: Meglio è haver a far con uno exercito di leoni, ch'è per capetanio un cervo, che *cum* un exercito de cervi, che ha per capetanio un leone. Apropinquato adunque il nostro campo, a dì 7, a la terra, veneno incontra la prima squadra, circa 150 turchi, in un passo stretto, dove feceno un poco de resistentia; *tamen* ebene de gratia a poterse redur dentro le mure, e a l'intrar lassono do di soi morti, uno de uno schiopeto, l'altro di una lanza. Confenzò per caso a piover quel zorno, et durò do zorni, che mai non fu possibile condur le nostre artilarie; *unde*, turchi vedendo li nostri de la guardia esser li a presso le mure, se lassono cazer un tolopam. Uno di nostri corse per tuorlo, e molti lo seguitoro. Turchi apostati ussitenò fuora da 180; se feceno forti li nostri a la posta di la guardia, poi molte digladiatione, moriteno doi di nostri et do di soi. Questo disordine sentito, el magnifico capetanio fece gran reprehension, per letere, al governador, el quale se ha excusato, che, contra sua voglia, e non sapendo cossa alcuna, fosse seguito; e hali ordinato fazino i reperi a le artilarie, et che 'l primo si parti dal suo hordine, sia impichato; e cussì se ha facto la nocte. E hanno impiantà cinque falconeti, con i quali a dì X hanno ruinate le soe trabache, facte, a modo ungharesco, sopra i muri. Fino a questo zorno se ha ateso a condur suso le artilarie; nel condur di le grosse se à persso un poco di tempo, per la difficoltà di le strade e per le molte pioze et mali tempi usati, secondo il consueto de l'inverno. Horra, *Dei gratia*, el tutto è reduto a bon termene. Questi zorni i nostri al castello, con i falconeti, feno il dover. Ben che poco far si puol con artilarie menute, e quelli dil castello hanno tyrato molti colpi ai nostri, e hanno facto pocho danno. Diman, piacendo, comenzerano a tirar tute le nostre artilarie grosse; et è opinion universal, farano tal fracasso a le mure, che, non obstante el numero preditto di turchi sono dentro, perchè di altri sono in tutto a presso 1000, e il loco ben munito, riusciremo con vittoria. E in questa impresa non si manca nè se mancherà di far tutto el possibile. L'altro heri zonse missier Simon Guoro, ch'era stà mandato, come dissi, versso i Cuzulari et el Galatam con alcune galie, per veder di haver certe fuste turchesche, si dicea ritrovarse de li. Dice non haver potuto, per il vento lo afazò, tuor li navilij erano a Patras, e haverse perhò reduto a le Peshiere, dove prese et afondò da XI tra gripi e navigoti da' inimici, et factoli quel danno l'ha possuto,